

莊氏族譜

懷恩堂訂

鼎山祥露族譜付梓紀略

古者國有史記。所以紀治亂興衰。鄉有族譜。用以誌源流盛典。煌煌無庸或闕。吾鄉族譜。久同荒廢。僅存墨鈔一冊。其紀載至勤勵公。肇基兩祥露。卽附闕如。有心人用抱無涯之戚矣。銀安弱冠渡洋謀生。每於公餘之際。卽念他日回梓。當集合。吾族之有志者。鳩資而繼續之。俾後人瞻依有自。不至紊亂宗祧。是安之懷此念者。數拾載於茲矣。乃未幾革命事起。國內外諸同志。競責銀安以奔走國事。安又念吾華。自崇禎煤山之變。全國淪於異族。同胞之不見天日者。迄今二百六十餘年。幸諸先烈躍起於先。安何人斯。敢不從諸公後。於是籌畫運動慘淡經營。幾二十餘載。始得還我河山。復我漢鼎。安乃獲喘息。存餘生。得以保首領。而歸故

鄉。亦諸先烈在天之靈。有以祐之也。年來耕稼之暇。檢斯冊而詳閱之。其始自森公。由唐季入閩。發祥於漳泉潮永。迄兩祥露之肇基祖勤勵公。卽已闕如。其間數百載。族派則蕃衍滋多。譜系則存亡絕續。安雖有志興修。其如年力衰頹。帮理乏人何。若欲存此墨鈔之冊。亦湮沒之。徒喚則又奈何。不得已姑將此墨鈔之冊。付諸梓人。印存百冊。以俟我族人之有心譜系者。得所問津焉。爰泐此以爲紀畧。

族行文字

民國十三年四月甲子桐月勤祖派下
長房十四世孫 銀安自誌
現年登六十九

重抄族譜記

嘗思欲考世系常知本源欲序昭穆當立乘譜是譜焉者我族中之不可無也然亦不可獨有當加抄而珍藏之庶免或失而無可稽焉賢少外遊老而回鄉閒坐於七房滋晚軒中見案頭一書啓而視之乃族譜也自森公入閩青陽分派至開基兩祥露之世次七崇而嗣續詢於長四六諸房皆無有存之者獨存此耳倘此譜之再沒將何處而問津哉爰整老管欲加抄本而此譜已生蛀虫字跡失真恐有訛抄而致訛傳因查西橋祥露五房系明澈十年前有抄其一字跡尙新使其弟明源往同安取携而來故得以依書而重抄之留存後世而知所自焉

清宣統二年庚戌梅月

勤祖派下竹房十四世孫

賓賢

重抄誌

族行文字

開閩始祖森公事實

公

諱森

字文盛唐懿宗咸通四年癸未七月十四日生籍光州固始人娶林氏與光州刺

史曾延世皆王潮之甥也唐僖宗中和元年八月壽州王緒作亂陷壽州緒本屠人與妹夫劉行全聚衆五百餘據本州一月復鳩衆萬餘人旋陷光州森公與潮及延世同心共憤血誓討賊時蔡州節度使秦宗權因表緒爲光州刺史而潮及弟審邦審知素以才氣知名緒遂以潮爲軍正中和二年黃巢取蔡州節度使秦宗權降之合兵圍陳州光啓元年乙巳朝廷招撫宗權宗權責租賦於光州王緒不能給宗權擊之緒懼悉舉光壽二州兵五千人渡江轉掠江洪虔州是月陷汀漳然皆不能守緒至漳州以道險阻令軍中毋以老弱自隨惟潮兄弟扶其母以從緒責之曰軍皆有法汝違吾令而不斬是無法也令斬其母潮曰人皆有母未有無母之人將軍奈何使人棄其母耶緒復令斬其母潮曰潮等事母如事將軍旣殺其母安用其子請先母死諸將士皆爲力請乃釋之望氣者謂緒曰軍中有王者氣於是士卒有勇略材能氣質魁岸者多因事殺之人人自危行至南安

森公及潮乃說其前鋒伏壯士篁竹中擒緒及縛以殉遂引兵將還光州潮約其屬秋毫無犯行及沙縣泉州張延魯以刺史廖彥若貪暴泉人苦之率耆老奉牛酒請潮爲州將潮沉勇有智略招懷散離均賦繕兵吏民咸服遂圍泉州殺彥若聞觀察使陳巖威名懼禍及森公乃擇於泉之永春塗橋壠村號烏洋家焉遂爲開閩莊氏基祖

青陽始祖古山公傳

公諱祐孫號古山年二十讀書重義志尙高遠自唐末族大以繁世有顯者光啓間有諱

森者從王潮入閩居泉之永春桃源里善政鄉歷五世至宋子孫相傳二百餘年聲名文物甲乎一方桃源之陽潭潭暈宇綿繡之山峨峨馬鬣實森公之七傳莊氏之名墳也自夏公賜第由桃源居郡城公亦遷居東門夏公登宋淳熙進士累官至兵部侍郎試尙書贈少師公亦列官廷署旣而有明農之志乃致政而歸愛青陽山木之秀時往游焉遂買田築室於其間因占籍故泉城之莊自夏而青陽之莊自公始也青陽之里有寶謨學士蔡次傳進士李節推道同志合恆爲文字之會泮渙優游不知紛華世利爲何物也嘗貽

厥孫謨以燕翼子故其創業垂訓皆光前之不緒啟後之良圖有足稱者配蔡氏寶謨學士之從妹也子五人俱英毅卓立帝昺南巡五人與表弟潮州司戶參軍蔡若濟謀迎駕值蒲壽庚之亂遂散處四方長遷於同安四遷於清漳五遷於潮陽俱爲望族二思齊三公茂還守青陽看守父墳卒卜葬于里之石鼓山下方下窆地忽震動火星三起因號其塋曰地震三星松楸蒼蒼歷宋至今二百餘年矣五世孫震彥者嘗修族譜而未立公傳今九世孫任輒續之其宗弟昌期乃執嚙以守宗祀者述公之本末與予爲傳予與昌期有師生誼不容辭故爲之序其事而申之曰夫好學近乎智好義事有終是蓋志尙之高遠而不溺於卑賤者也青陽之志在於讀書重義故其出處合乎仕止久速之時遷居得夫擇里處仁之智承先啓後而又能效彼繼志述事貽謀燕翼之爲宜其爲開基之祖子孫蕃衍百世其昌也

賜進士及弟南京國子監祭酒安福劉進題

昔大明弘治改歲元年戊申孟冬之望泉州儒學訓導弋陽敬書于官寓

古山公像讚匪通而執匪隱而匿懸衡之平趨道之的箕裘乎莊錦繡其昌祖於青陽百世不忘

安福劉進書并題

晉江青陽莊氏續修族譜凡例

一祭祀祖先所以寓報本追遠之意務在孝敬以盡其誠臨祭之時正衣冠如祖考之在上毋得嬉笑對語離席自便與夫跛倚欠伸噦噫嚏咳一切失容不恭凡子孫者切宜戒諸

一按先儒高氏曰觀古木主之制旁題主祀之名而知宗子之法不可廢也宗子承家主祭有君子之道諸子不得而抗焉又按朱子曰宗子越在他國則不得主祭而次子居者代之祝曰孝子某使介子某執事然猶不敢入廟特望墓爲壇以祭卽二先正之言觀之是知承家主祭在於宗子也明矣予家始祖之祭宗子遠居同安族屬往往以次房非宗子而爭祭不決須依朱文公云次子居者代之庶不失追遠之意云爾

一我宗族蕃盛子孫衆多須依鄭氏家訓云子弟有未冠巾者不許以行字不許以第稱

庶幾合於古人責成人之意

一凡贅壻者舊譜不修其名於牒以文公家禮贅壻有升降之服然所生之情烏可絕乎夫譜牒之作尙期千百世下親盡服殺者輯而修之以爲一家一氣之出况期功兄弟而贅壻者便棄而不書於牒何哉今乃修之一行第其舊譜以世世相續爲次今宗族蕃衍有祖行未生而孫行已老者若世世相續爲次則孫行久闕以俟祖行之生可乎今則一世至六世照舊譜而修自七世而下隨一世各起第行之次仍取金木水火土之義各二十家詩爲世世第行之制周而復始以續之

一士農工商人分內事也我之子孫苟有不安其分者牒則顯書以戒後人或有下愚滋甚所爲不法而至於忝祖者牒則削去其名字而不載使後世知有警而爲宗族所棄也若有孝子慈孫能維其後者牒則仍追而載之從寬典嘉有後也

成化三十三年歲次丁未仲秋朔旦雲孫壬輒謹誌

泉南莊氏重修族譜

君子之於世譜不可不知亦不可不重古者有世官世祿之制又有大宗小宗之法以維持之故其宗不紊而昭穆親疎尊卑等殺皆有所辨先後久遠之次皆有可見後世官失其守祿不世於家宗法又壞而不明使於此而無譜以繫之其何以明其等級辨其親疎別其宗派合其散而使之不離秩其序而使不紊哉此君子所以有垂於譜而不可不修也宏治三年晉江鄉進士莊君榮曾試禮部持其家譜請予序之且曰榮之先世光州固始人唐光啓中因事始祖森公遷泉之永春桃源里宋南渡後遠祖祐孫與叔夏者徙居郡城後見郡城南陽山地勝俗美徙居之其後子孫蕃衍散居於銀同清漳潮陽烏嶼武

相承之誤蓋曾叔祖非叔也

以叔行稱夏公係家譜

榮羅裳下渚陳江等處萬有餘指自祐孫至今十一世矣居桃源以上下譜毀於宋末兵

上謂在固始下謂韋章中

四公是也

燹莫究其詳永樂二十一年榮之高祖叔震彥曾祖

諱

應愈相與謀曰吾家上世譜毀失

於宋末兵燹其詳無可攷而知者不可無譜以示我後之人乃始自祐孫公遷青陽爲一

世祖餘以世而系之曾叔祖

諱

銘喜其譜之成後備記其生卒諱字第行氏配墓所註於

名位之下求序於韓府長史郡人楊耀宗韓王嘉我祖宗累世積德又能盡忠宗室不仕

胡元大書莊氏族譜四字以賜之譜雖成而行習未備銘卒族兄壬輒嘆曰我祖宗自來登仕版代不乏人惟不仕元而隱居獨善行義著於鄉里者猶多譜不備何以承先德示後昆乃續凡例畫宗支叙昭穆又作五行相生之詩第其世次仍作譜於其後人爲一傳書其行實又集誌六十餘篇遺像五十餘幅石公詩讚百餘首以附於後名曰族譜外集未有爲之序者敢求一言以爲斯譜光吾泉著姓者數家皆宋時名宦宰輔而莊氏獨登科第仕於時自宋至今不閱其譜不可縷數蓋祖宗積慶之餘故其遺後綿綿不絕如此譜之修肇於震彥迄壬輒幾百年而譜始克大備其用心可謂勤而不苟尊祖敬宗之心可謂兼盡而無遺子孫閱斯譜孝敬之心豈不油然而生乎異日躋顯耀建功業播聲實於後世斯譜豈不益有光乎因書以遺之

賜進士通議大夫吏部左侍郎莆田彭韶書

重修家乘序

用賓有感於合族之道一日以酒與食聚衆父老而告之曰譜合修理衆俱默然賓曰得

非以其事之難乎衆曰然賓曰吾能任難衆曰費將誰經賓曰吾自爲費然而生卒年月不可不詳也人自爲政則力不可不煩衆咸曰諾又一日以酒與食聚諸儒者而告之曰譜不可以不文是儒者之責也某傳其序則某各爲之集我從彙其稿其有不用心者寡矣觀易之萃曰王假有廟假王廟者之事也王者之萃渙莫先於假廟士民之萃渙莫先於修譜事殊而功同也譜必有世系傳世系所以明有親也必先有行次所以明有尊也必有宗子傳宗子尊親之統也又必有祠堂傳祠堂尊親之會也顯之弗揚人將焉激是故作縉紳傳善之弗彰惡將焉懲是故作行義傳本之弗敦財將焉殖是故作起家傳女之弗貞內將焉助是作賢婦傳述前者必據不敢妄指也傳後者必信不敢溢美也自我述之自我傳之謂我妄也溢也人其謂賓何賓其謂譜何據矣信矣賓盡吾心焉耳族人之合不合賓不能知也

嘉靖丁未年四月朔十一世孫用賓誌

銀同族行係惟字

青陽十二世孫民懷合修五房族譜誌

始祖森公原係河南光州固始縣人也出身起居已登載譜一一詳明不待懷之再贅者茲因青陽祐孫古山公生五子長公哲分居同安次思齊三公茂同居本地青陽四公望分居清漳觀潯五公從分居潮陽縣駕尾村向者各房在地修造只就在地修之未有合修五房譜只謂之房譜則可謂之族譜則未也且祖先源流俱不獲真而子孫零落前後未及盡錄此不得古人設譜之意也頃甲午冬祭之日二房十二世孫國禎告諸衆曰今之家廟我父奇峯公首倡今十二世孫民懷重建辛巳告成有年但所缺者合族圖譜未修耳衆曰吾姪是責當任之卽令懷往同安觀潯潮陽會伯叔兄某某等欣然不辭叔兄遂委弟某某等就捐已報衆填寫支派不月之間修成公哲公長房之譜懷將譜執往清漳觀潯潮陽會諸房親僉曰此譜世系纖明子孫無漏悉依格式修造今果五房族譜完懷成執付與各房收覽開閱之下百子千孫盡在目中世雖遠而實近居雖離而實合衆雖疏而實親未遂之志於茲繼之未成之緒於今述之子孫之職庶稍塞無歉而祖先亦可以含笑於地下矣謹誌

十二世孫民懷重修莊氏族譜凡例

一吾族子孫有志業儒名登仕藉此固其上下而農工商賈各居其一務在各勤其事不可遊手遊食以干國法之禁

一五服雖盡尊卑名分攸存吾族子孫間有挾貴凌賤恃富輕貧不守尊卑名分者族人當誚讓毋得故縱以順其情爲士大夫君子所哂轉相效尤亂我家法故曰宗族廢而天下無世家

一名諱之類予見名門巨族宗派雖云疏遠名諱不至相混賴有譜牒存焉今吾族中率多以先進之名復命其子若孫至一族而二三其名者有之甚然可厭以無譜牒可稽故耳修譜之後各宜改更以見大家氣象

一晏子之貴父族無不乘車母族無不衣帛妻族無不足於衣食君子謂晏能善推恩吾族有貴顯子孫者當念祖宗積德始有今日之榮而可推恩以及族人也若獨享富貴而不恤及宗族則爲祖宗之罪人亦何羨其富貴乎

一平生有德行文章爲世所稱重者固依例書之或有誌銘輓章祭文行狀之類爲縉紳士大夫所表著亦謹書附譜牒之末庶幾景仰前人示慕來裔云

一譜法名族別有抱養異姓之子爲嗣者陽若有繼陰實有絕吾族不幸無子者宜立昭穆相配或所親愛爲嗣使之一本故耳本之一者氣之一母得糊塗以亂宗祀

一凡爲人後者捨所生處註曰出嗣於所嗣處照例書之蓋取宋儒程子謂所後人者爲父母則所生者爲伯叔父母之義也

一凡吾族中有夫早世而婦矢志守節當相率獎勸以勵其志舉呈有司奏請旌表以爲門閭之光

一方遜志云正月之吉會族以修譜十二月之冬會族以收其行四時孟月以讀譜或時爲酒食以合其歡胥相告戒以匡其失周恤貧乏以全其生此禮雖不可行之於今猶可錄之以望於後有能體而行之始見有大家氣象

一世繫圖法截以五世一更端自一代至五代而止於各祖諱下註有傳或無傳又自五

代有傳者提起至九世而止如前所註後倣此蓋法歐陽氏之例也

世次辨疑

世次宜審其實否則僭僭則亂於理爲不順於情爲不安謹按我青陽基祖古山公舊譜

載爲翼公次子元郎其伯兄也歷傳四朝衆口一辭歲雍正六年戊申葭月旻以永邑列

祖墳被豪強盜戕奉族命控於官因造焉省墓畢族姓分居永德二邑者湖上小岫棗嶺

蓬萊等處古兵燹不及之地也古譜昭然詳其紀載古山之父爲彌吉彌吉之父爲元郎

元郎之父爲翼公是古山乃翼公會孫非其子也第相沿既久誰敢妄自改正以取妄作

之罪雖然世次重事也魯躋僖公春秋非之臧文仲被縱逆之譏假若公明繫翼公之曾

孫以曾爲禰是使越次頂接無父無祖公何以自安於九原哉然無援引確據改習亦難

遽改稽翼公兄弟四人翼公居長次果三晦四則夏公也夏公生宋紹興廿五年乙亥七

寧宗年號

月十八日亥時古山公生於嘉定四年辛未六月初四日子時相去五十七年若以古山

爲翼公之子夏公則季叔也豈有同一母所生季叔與長孫相去五十七年哉可疑一也

高宗年號